



O'ZBEKISTON RESPUBLIKASI VAZIRLAR MAHKAMASINING QARORI

20 22 yil « 16» sentabr

№ 507

Toshkent sh.

Шаҳар йўловчилар транспортда айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш юзасидан давлат хизматлари кўрсатишнинг маъмурий регламентини тасдиқлаш тўғрисида

Ўзбекистон Республикаси Президентининг “Аҳоли ва тадбиркорлик субъектларига давлат хизматларидан фойдаланишда янада қулай шароитлар яратиш, бу борада бюрократик тўсиқларни қисқартириш бўйича кўшимча чора-тадбирлар тўғрисида” 2021 йил 23 мартдаги ПФ–6191-сон Фармониға мувофиқ, шаҳар йўловчилар транспортдан бепул фойдаланишни янада такомиллаштириш ҳамда шаҳар йўловчилар транспортда (йўналишли ва йўналишсиз таксидан ташқари) (кейинги ўринларда – шаҳар йўловчилар транспорти) бепул юриш ҳуқуқини берувчи имтиёзли транспорт карталарини жорий қилиш мақсадида Вазирлар Маҳкамаси **қарор қилади:**

1. Қуйидагилар:

а) Ўзбекистон Республикасининг “Шаҳар йўловчилар транспортдан бепул фойдаланишни тартибга солиш тўғрисида” Қонуниға мувофиқ қуйидаги тоифадаги фуқароларға шаҳар йўловчилар транспортдан (таксидан ташқари) бепул фойдаланиш ҳуқуқи берилганлиги:

1941-1945 йиллардаги уруш қатнашчилари жумласидан бўлмиш ҳарбий хизматчилар;

1941-1945 йиллардаги уруш ногиронлари ва урушнинг I гуруҳ ногиронига ҳамроҳлик қилувчи шахс;

1941-1945 йиллардаги уруш даврида фронт ортида фидокорона меҳнати ва бенуқсон ҳарбий хизмати учун орден ва медаллар билан тақдирланган шахслар;

Афғонистон Республикасида ва бошқа мамлакатларнинг ҳудудидаги жанговар ҳаракатларда қатнашган собиқ байналминалчи жангчилар жумласидан бўлмиш фуқаролар;

ҳақиқий муддатли ҳарбий хизматни ўтаётган ҳарбий хизматчилар ва контракт бўйича оддий аскарлар ҳамда сержантлар таркибидаги ҳарбий хизматчилар;

Чернобиль АЭС ҳалокати оқибатида нурланиш касаллигига чалинган ва уни бошдан кечирган шахслар;

ногиронлиги бўлган кўзи ожиз шахслар ва ногиронлиги бўлган кўзи ожиз шахсга сафарларда ҳамроҳлик қилувчи шахс;

б) Вазирлар Маҳкамасининг “Умумий фойдаланиладиган транспортда йўловчи ташишда йўлқира ҳақини тўлашнинг автоматлаштирилган тизимини жорий этиш тўғрисида” 2019 йил 25 ноябрдаги 948-сон қарорига мувофиқ:

умумий фойдаланиладиган транспортда йўловчи ташиш учун йўлқира ҳақини тўлашнинг автоматлаштирилган тизими жорий этилганлиги;

Тошкент, Самарқанд, Урганч ва Қарши шаҳарларидаги жамоат транспорти ҳаракат таркиби 3 107 дона стационар валидаторлар билан жиҳозланганлиги ва 555 минг дона транспорт карталари муомалага чиқарилганлиги;

йўлқира ҳақини тўлашнинг автоматлаштирилган тизими мобил иловаси фойдаланувчилари сони 320 минг нафарга етганлиги маълумот учун қабул қилинсин.

2. Транспорт вазирлиги, Адлия вазирлиги ва Молия вазирлигининг шаҳар йўловчилар транспортида (йўналишли ва йўналишсиз таксидан ташқари) айрим тоифадаги фуқароларга бепул юриш ҳуқуқини берувчи имтиёзли транспорт карталарини жорий этиш тўғрисидаги таклифи маъқуллансин.

3. Шаҳар йўловчилар транспортида (йўналишли ва йўналишсиз таксидан ташқари) айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш юзасидан давлат хизматлари кўрсатишнинг маъмурий регламенти иловага мувофиқ тасдиқлансин.

4. Шундай тартиб ўрнатилсинки, унга кўра:

а) шаҳар йўловчилар транспортида айрим тоифадаги фуқароларга бепул юриш ҳуқуқини берувчи имтиёзли транспорт карталари берилиши Қорақалпоғистон Республикаси Транспорт вазирлиги, вилоятлар ва Тошкент шаҳар транспорт бошқармалари ҳамда Ягона интерактив давлат хизматлари портали (кейинги ўринларда – ЯИДХП) орқали амалга оширилади;

б) шаҳар йўловчилар транспортида айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш босқичма-босқич:

Тошкент ва Самарқанд шаҳарларида – 2023 йил 1 январдан бошлаб;

республиканинг барча шаҳарларида – 2023 йил 1 майдан бошлаб амалга оширилади;

в) эски намунада берилган шаҳар йўловчилар транспортида (таксидан ташқари) айрим тоифадаги фуқароларга бепул юриш ҳуқуқини берувчи ягона гувоҳномалар 2023 йил 1 сентябрга қадар ўз кучини сақлаб қолади.

5. Молия вазирлиги ҳузуридаги бюджетдан ташқари Пенсия жамғармаси, Мудофаа вазирлиги, Ички ишлар вазирлиги, Фавқулодда вазиятлар вазирлиги, Давлат хавфсизлик хизмати 2022 йил 1 ноябрга қадар ушбу қарор 1-бандининг “а” кичик бандида кўрсатилган тоифадаги шахслар бўйича маълумотлар базасини яратсин.

6. Ахборот технологиялари ва коммуникацияларини ривожлантириш вазирлиги:

а) Адлия вазирлиги ва Транспорт вазирлиги билан биргаликда 2023 йил 1 январдан:

ушбу қарорга мувофиқ давлат хизматлари ЯИДХП орқали жорий этилишини таъминласин;

ЯИДХПда давлат хизматлари кўрсатилишининг ҳар бир босқичида муружаатлар кўриб чиқилишини кузатиб бориш тартибини жорий этсин;

б) 2022 йил 1 декабрга қадар Молия вазирлиги ҳузуридаги бюджетдан ташқари Пенсия жамғармаси, Мудофаа вазирлиги, Ички ишлар вазирлиги, Фавқулодда вазиятлар вазирлиги, Давлат хавфсизлик хизмати ҳамда Тиббий-ижтимоий хизматларни ривожлантириш агентлигининг тегишли ахборот тизимлари Ягона интерактив давлат хизматлари порталига ҳамда Транспорт вазирлиги ахборот тизимига интеграция қилинишини таъминласин.

7. Транспорт вазирлиги:

Тошкент ва Самарқанд шаҳарларида – 2023 йил 1 январдан, республиканинг барча шаҳарларида – 2023 йил 1 майдан босқичма-босқич шаҳар йўловчилар транспортида айрим тоифадаги фуқароларга бепул юриш ҳуқуқини берувчи имтиёзли транспорт карталарини ўрнатилган тартибда расмийлаштириб, эгаларига топширишни таъминласин;

имтиёзли транспорт карталарини тайёрлаш ва эгасига етказиб бериш билан боғлиқ харажатларни Транспорт вазирлиги ҳузуридаги Транспорт ва логистикани ривожлантириш жамғармаси маблағлари ҳисобидан амалга оширсин;

Молия вазирлиги, Халқ таълими вазирлиги ҳамда Олий ва ўрта-махсус таълим вазирлиги билан биргаликда уч ой муддатда имтиёзли юриш ҳуқуқига эга бўлган йўловчиларга (пензионерлар, ногиронлиги бўлган шахслар, ўқувчилар ва талабалар) шаҳар йўловчилар транспортида (йўналишли ва йўналишсиз таксидан ташқари) имтиёзли юриш ҳуқуқини берувчи имтиёзли транспорт карталарини бериш тартибини такомиллаштириш юзасидан Вазирлар Маҳкамасига таклиф киритсин.

8. Адлия вазирлиги ва унинг ҳудудий бошқармалари ушбу қарор талаблари ижроси бўйича давлат органлари ва бошқа ташкилотларнинг фаолияти устидан, шу жумладан, ЯИДХП орқали доимий назорат ўрнатсин ва мониторинг олиб борсин.

9. Транспорт вазирлиги бошқа манфаатдор вазирлик ва идоралар билан биргаликда ўзлари қабул қилган норматив-ҳуқуқий ҳужжатларни икки ой муддатда ушбу қарорга мувофиқлаштиради.

10. Мазкур қарорнинг ижросини назорат қилиш Ўзбекистон Республикаси Бош вазирининг биринчи ўринбосари А.Ж. Раматов, Ўзбекистон Республикаси транспорт вазири И.Р. Махкамов ҳамда Ўзбекистон Республикаси адлия вазири Р.Қ. Давлетов зиммасига юклансин.

**Ўзбекистон Республикасининг
Бош вазири**



А. Арипов

Вазирлар Маҳкамасининг
2022 йил “16” сентябрдаги 507-сон қарорига
илова

**Шаҳар йўловчилар транспортида (йўналишли ва йўналишсиз таксидан ташқари) айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш юзасидан давлат хизматлари кўрсатишнинг
МАЪМУРИЙ РЕГЛАМЕНТИ**

1-боб. Умумий қоидалар

1. Мазкур Регламент шаҳар йўловчилар транспортида (йўналишли ва йўналишсиз таксидан ташқари) (кейинги ўринларда – шаҳар йўловчилар транспорти) айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш юзасидан давлат хизматлари кўрсатиш тартибини белгилайди.

2. Ушбу Регламентда қуйидаги тушунчалардан фойдаланилади:

муружаат қилувчи – имтиёзли транспорт картасини олиш учун муружаат этган жисмоний шахс;

имтиёзли транспорт картаси – шаҳар йўловчилар транспортда (йўналишли ва йўналишсиз таксидан ташқари) автоматлаштирилган тўлов тизими оператори маълумотлар базасида рўйхатга олинган йўловчига бепул юриш ҳуқуқини кафолатлайдиган, транспортдан фойдаланиш сони ва бир транспортдан бошқасига чиқиш сони чекланмайдиган шахсийлаштирилган транспорт картаси;

имтиёзли транспорт карталари реестри – имтиёзли транспорт карталарини бериш бўйича маълумотлар электрон тарзда шакллантириладиган база.

3. Имтиёзли транспорт картаси эгаси Ўзбекистон Республикасининг барча ҳудудларида шаҳар йўловчилар транспортида бепул юриш ҳуқуқига эга.

4. Қуйидаги шахсларга имтиёзли транспорт картаси тақдим этилади:

1941-1945 йиллардаги уруш қатнашчилари жумласидан бўлмиш ҳарбий хизматчилар;

1941-1945 йиллардаги уруш ногиронлари;

1941-1945 йиллардаги уруш даврида фронт ортида фидокорона меҳнати ва бенуқсон ҳарбий хизмати учун орден ва медаллар билан тақдирланган шахслар;

Афғонистон Республикасида ва бошқа мамлакатларнинг ҳудудидаги жанговар ҳаракатларда қатнашган собиқ байналминалчи жангчилар жумласидан бўлмиш фуқаролар;

ҳақиқий муддатли ҳарбий хизматни ўтаётган ҳарбий хизматчилар ва контракт бўйича оддий аскарлар ҳамда сержантлар таркибидаги ҳарбий хизматчилар;

Чернобиль АЭС ҳалокати оқибатида нурланиш касаллигига чалинган ва уни бошдан кечирган шахслар;

ногиронлиги бўлган кўзи ожиз шахслар.

5. Ҳақиқий муддатли ҳарбий хизматни ўтаётган ҳарбий хизматчиларга ва контракт бўйича оддий аскарлар ҳамда сержантлар таркибидаги ҳарбий хизматчиларга имтиёзли транспорт карталари берилмайди. Улар ҳарбий гувоҳномаси ёки контракт асосида хизмат қилувчининг шахсий гувоҳномасини кўрсатган тақдирда шаҳар йўловчилар транспортида бепул юриш ҳуқуқидан фойдаланади.

6. 1941-1945 йиллардаги уруш I гуруҳ ногиронларига ва ногиронлиги бўлган кўзи ожиз шахсларга бериладиган имтиёзли транспорт картаси уларга сафарларда ҳамроҳлик қилувчи бир шахсга ҳам шаҳар йўловчилар транспортдан бепул фойдаланиш ҳуқуқини беради.

7. Давлат хизматлари Қорақалпоғистон Республикаси Транспорт вазирлиги, вилоятлар ва Тошкент шаҳар транспорт бошқармалари (кейинги ўринларда – ваколатли орган) томонидан ёки Ўзбекистон Республикаси Ягона интерактив давлат хизматлари портали (кейинги ўринларда – ЯИДХП) орқали кўрсатилади.

8. Шаҳар йўловчилар транспортида айрим тоифадаги фуқароларга бепул юриш ҳуқуқини берувчи имтиёзли транспорт карталарини бериш юзасидан давлат хизматлари кўрсатилганлиги учун йиғим ундирилмайди.

9. Имтиёзли транспорт картаси чекланмаган муддатга берилади.

10. Имтиёзли транспорт картасини бошқа шахсларга бериш тақиқланади.

2-боб. Давлат хизмати кўрсатиш тартиби

11. Давлат хизматлари кўрсатиш ушбу Регламентга 1-иловага мувофиқ схема бўйича амалга оширилади.

12. Мурожаат қилувчи давлат хизматларидан фойдаланиш учун ваколатли органга ўзи ёки у ваколат берган шахс келиб мурожаат этади ёхуд давлат хизматидан электрон тарзда фойдаланиш учун ЯИДХПда рўйхатдан ўтади.

13. Мурожаат қилувчи ўзи ёки у ваколат берган шахс келиб мурожаат қилган тақдирда, ваколатли орган ходими мурожаат қилувчининг номидан ЯИДХП орқали мурожаат этган тақдирда мустақил равишда ушбу Регламентга 2-иловага мувофиқ шаклдаги сўровномани электрон тарзда тўлдиради.

14. Сўровнома тўлдирилгандан сўнг мурожаат қилувчи маълумотларнинг тўғрилигини текшириб, сўровномани тасдиқлайди.

Мурожаат қилувчи томонидан сўровномани ЭРИ билан тасдиқлаш талаб этилмайди.

15. Мурожаат қилувчи томонидан сўровномада нотўғри маълумотларнинг кўрсатилиши ёки уни тасдиқлашнинг рад этилиши давлат хизматлари кўрсатишни рад этиш учун асос ҳисобланади.

16. Мурожаат қилувчи давлат хизматларини кўрсатишнинг ҳар қандай босқичида улардан фойдаланишдан бош тортиш ҳуқуқига эга. Мурожаат қилувчи давлат хизматидан фойдаланишдан бош тортганда унинг сўровномаси кўриб чиқилмасдан қолдирилади.

17. Ваколатли орган сўровнома олинганидан сўнг шаҳар йўловчилар транспортида бепул юриш ҳуқуқини берувчи имтиёзли транспорт картасини олиш учун мурожаат қилган шахс мазкур Регламентнинг 4-бандида назарда тутилган тоифага киришини Молия вазирлиги ҳузуридаги бюджетдан ташқари Пенсия жамғармаси, Мудофаа вазирлиги, Ички ишлар вазирлиги, Фавқулодда вазиятлар вазирлиги, Давлат хавфсизлик хизмати ҳамда Тиббий-ижтимоий хизматларни ривожлантириш агентлигининг ахборот тизимлари орқали ўрганади.

18. Ваколатли орган томонидан икки иш куни мобайнида мурожаат қилган шахснинг маълумотларини ўрганиш натижасига кўра имтиёзли транспорт картасини бериш ёки унинг берилишини рад этиш ҳақида қарор қабул қилинади ҳамда бу ҳақидаги маълумот мурожаат қилувчига ёки ЯИДХПга юборилади. Имтиёзли транспорт картасини бериш рад этилган тақдирда маълумотда рад этиш сабаблари кўрсатилади.

19. Ваколатли орган имтиёзли транспорт картасини бериш ҳақида қарор қабул қилганидан сўнг бир иш куни ичида имтиёзли транспорт картасини расмийлаштиради ҳамда уни ваколатли шахснинг ЭРИси билан тасдиқлаб, мурожаат қилувчига топширилганлиги маълум қилинадиган буюртма хат орқали юборади.

3-боб. Имтиёзли транспорт картасининг дубликатини бериш, алмаштириш ва уни бекор қилиш

20. Имтиёзли транспорт картаси эгаси имтиёзли транспорт картаси йўқолган тақдирда, уни автоматлаштирилган тўлов тизими оператори маълумотлар базасидан рўйхатдан чиқариш учун дарҳол имтиёзли транспорт картасини берган ваколатли органга, шу жумладан ЯИДХП орқали мурожаат қилиши лозим.

21. Имтиёзли транспорт картаси йўқолган ёки яроқсиз ҳолга келган тақдирда, мурожаат қилувчига бепул асосда бошқа имтиёзли транспорт картаси берилади. Бунда, имтиёзли транспорт картаси яроқсиз ҳолга келган тақдирда, имтиёзли транспорт картаси эгаси уни ваколатли органга топшириши лозим.

22. Имтиёзли транспорт картаси сохта ҳужжатлар тақдим этган ҳолда олинганлиги аниқланганда бекор қилинади ва автоматлаштирилган тўлов тизими оператори маълумотлар базасидан рўйхатдан чиқарилади.

4-боб. Имтиёзли транспорт карталари реестри

23. Транспорт вазирлиги белгиланган тартибда имтиёзли транспорт карталари реестрини юритади.

Имтиёзли транспорт карталари реестрида қуйидагилар кўрсатилиши керак:

фуқаронинг фамилияси, исми ва отасининг исми;

фуқаронинг турар жой манзили;

фуқаролик паспортининг серияси (идентификацияловчи ID-картасининг серияси) ва рақами, жисмоний шахснинг шахсий идентификация рақами (ЖШШИР);

берилган имтиёзли транспорт картасининг серияси ва рақами;

фуқаронинг мазкур Регламентнинг 4-бандида назарда тутилган шахслар тоифасига киришини тасдиқловчи ҳужжат тури ва рақами.

5-боб. Шаҳар йўловчилар транспортда (йўналишли ва йўналишсиз таксидан ташқари) бепул юриш ҳуқуқига эга бўлган шахсларнинг рўйхатини хатловдан ўтказиш

24. Ваколатли орган томонидан шаҳар йўловчилар транспортда бепул юриш ҳуқуқига эга бўлган шахслар рўйхати ҳар чоракда бир марта хатловдан ўтказилади.

25. Ваколатли орган имтиёзли транспорт карталари реестридан чиқиб кетган шахсларни аниқлаш мақсадида ахборот тизимлари орқали Молия вазирлиги ҳузуридаги бюджетдан ташқари Пенсия жамғармаси, Мудофаа вазирлиги, Ички ишлар вазирлиги, Фавқулодда вазиятлар вазирлиги, Давлат хавфсизлик хизмати ҳамда Тиббий-ижтимоий хизматларни ривожлантириш агентлигининг мазкур Регламентнинг 4-бандида назарда тутилган шахслар тўғрисидаги маълумотларини ўрганади.

26. Ўрганиш натижалари бўйича имтиёзли транспорт карталари реестрига тегишли ўзгартиришлар киритилади.

27. Имтиёзли транспорт карталари реестридан чиқиб кетган шахсларнинг имтиёзли транспорт карталари автоматлаштирилган тўлов тизими оператори маълумотлар базасидан рўйхатдан чиқарилади.

6-боб. Якуний қоидалар

28. Ваколатли орган ўз фаолиятини амалга ошириши натижасида олинган маълумотларнинг сир сақланишини таъминлайди.

29. Мурожаат қилувчилар давлат органлари ва бошқа ташкилотлар ходимларининг хатти-ҳаракатлари юзасидан қонунчилик ҳужжатларида белгиланган тартибда шикоят қилиши мумкин.

30. Мазкур Регламент талаблари бузилишида айбдор бўлган шахслар қонунчилик ҳужжатларида белгиланган тартибда жавобгар бўлади.

Шаҳар йўловчилар транспортида
(йўналишли ва йўналишсиз таксидан
ташқари) айрим тоифадаги фуқароларга
бепул юриш ҳуқуқини берувчи имтиёзли
транспорт карталарини бериш юзасидан
давлат хизматлари кўрсатишнинг
маъмурий регламентига
1-илова

Шаҳар йўловчилар транспортида (йўналишли ва йўналишсиз таксидан ташқари)
айрим тоифадаги фуқароларга бепул юриш ҳуқуқини берувчи имтиёзли транспорт
карталарини бериш бўйича давлат хизматлари кўрсатиш

СХЕМАСИ

Босқичлар	Субъектлар	Механизм	Муддатлар
1-босқич	Мурожаат қилувчи ёки у ваколат берган шахс	1. Имтиёзли транспорт картасини олиш учун Қорақалпоғистон Республикаси Транспорт вазирлиги, вилоятлар ва Тошкент шаҳар транспорт бошқармаларига (кейинги ўринларда – ваколатли орган) келиб мурожаат қилади. 2. ЯИДХПда рўйхатдан ўтади ва сўровнома шаклини тўлдиради.	1. Хоҳишига кўра 2. Мурожаат қилинганда
2-босқич	Ваколатли орган	1. Имтиёзли транспорт картасини олиш учун мурожаат қилган шахс тегишли тоифага кириши тўғрисидаги маълумотларни Молия вазирлиги ҳузуридаги бюджетдан ташқари Пенсия жамғармаси, Мудофаа вазирлиги, Ички ишлар вазирлиги, Фавқулодда вазиятлар вазирлиги, Давлат хавфсизлик хизмати ҳамда Тиббий-ижтимоий хизматларни ривожлантириш агентлигининг ахборот тизимлари орқали ўрганади. 2. Ўрганиш натижасига асосан имтиёзли транспорт картасини бериш ёки уни рад этиш ҳақида қарор қабул қилади ҳамда бу ҳақидаги маълумотни мурожаат қилувчига ёки ЯИДХПга электрон тарзда юборади. Имтиёзли транспорт картасини бериш рад этилган тақдирда, маълумотда рад этиш сабабларини кўрсатади.	Сўровнома тушганидан сўнг 2 иш куни мобайнида
3-босқич	Ваколатли орган	Имтиёзли транспорт картасини расмийлаштиради ҳамда уни мурожаат қилувчига топширилганлиги маълум қилинадиган буюртма хат орқали юборади.	Қарор қабул қилинганидан сўнг 1 иш куни мобайнида



Шаҳар йўловчилар транспортда
(йўналишли ва йўналишсиз таксидан
ташқари) айрим тоифадаги фуқароларга
бепул юриш ҳуқуқини берувчи имтиёзли
транспорт карталарини бериш юзасидан
давлат хизматлари кўрсатишнинг
маъмурий регламентига
2-илова

**Шаҳар йўловчилар транспортда (йўналишли ва йўналишсиз таксидан ташқари)
айрим тоифадаги фуқароларга бепул юриш ҳуқуқини берувчи имтиёзли транспорт
карталарини бериш бўйича
СЎРОВНОМА**

I. Мурोजаат қилувчи тўғрисидаги маълумотлар	
1. Шаҳар йўловчилар транспортдан (йўналишли ва йўналишсиз таксидан ташқари) бепул фойдаланиш ҳуқуқига эга бўлган шахслар тоифалари	1941–1945 йиллардаги уруш қатнашчилари жумласидан бўлмиш ҳарбий хизматчилар
	1941–1945 йиллардаги уруш ногиронлари ва урушнинг I гуруҳ ногиронига ҳамроҳлик қилувчи шахс
	1941–1945 йиллардаги уруш даврида фронт ортида фидокорона меҳнати ва бенуқсон ҳарбий хизмати учун орден ва медаллар билан тақдирланган шахслар
	Афғонистон Республикасида ва бошқа мамлакатларнинг ҳудудидаги жанговар ҳаракатларда қатнашган собиқ байналмилалчи жангчилар жумласидан бўлмиш фуқаролар
	Чернобиль АЭС ҳалокати оқибатида нурланиш касаллигига чалинган ва уни бошдан кечирган шахслар
	ногиронлиги бўлган кўзи ожиз шахслар ва ногиронлиги бўлган кўзи ожиз шахсга сафарларда ҳамроҳлик қилувчи шахс
2. Фамилияси:	
3. Исми:	
4. Отасининг исми: (мавжуд бўлса)	
5. Туғилган санаси:	
6. Паспорт ёки идентификацияловчи ID-картаси серияси ва рақами:	
7. Жисмоний шахснинг идентификацион рақами (ЖШШИР)	
8. Манзил:	
9. Телефон рақами:	
10. Электрон почта манзили (мавжуд бўлса):	
II. Мурोजаат ваколатли шахс томонидан берилганида тўлдирилади	
1. Фамилияси:	
2. Исми:	
3. Отасининг исми: (мавжуд бўлса)	
4. Туғилган санаси:	
5. Паспорт ёки идентификацияловчи ID-картаси серияси ва рақами:	
6. Телефон рақами:	
7. Электрон почта манзили (мавжуд бўлса):	